



10. februar 2016

UPA 2016/70

Inatsisartut suleriaasiat § 36 naapertorlugu apeqquteqaat aallaavigalugu oqallisissiaq matumuuna imaattoq matumuuna saqqummiuppara.

Ineqarnermut akiliutit qaffakkiartuinnartut, kiisalu boligsikring tapiissutit qaffanneqarnissaat , aammalu kiassarnermut akiliutit qaffasippallaarnerat pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen Partii Naleraq)

Tungavilersuut:

Ukiuni makkunani ineqarnermut akit innuttaasunik amerlasuunik assut inuuniarnikkut ilungersunartorsiortitsivoq akit aningaasarsiakitsut sulisartullu eqqarsaatigalugit qaffasippallaarujussuarnerat pissutigalugu. Taamatullu aamma kiassarinnikkut akiliutit ilaatigut illumi attartornertut naleqalernikuusut isummersorfigineqartariaqalermata.

Ilaqutariit meerartallit aningaasarsiakitsut inuuniarnikkut assut ilungersunartumik inissisimalernikuupput ineqarnermut akit akilertakkt aningaasarsiat eqqarsaatigalugit qaffasippallaarnerat pissutigalugu. Ukiuni makkunani inuuniarnikkut ajornartorsiutit annertoorujussuusut tamatta ilisimavagut, ilaqutariippassuillu aamma anisitaasartut amerlasoorparujussuusut uppersaatissaqartillugit.

Nalunnigilarput ineqarnermut tapiissut boligsikring atuuttoq, kisiannili ukiut arlalinngorpai naleqqussaaqqittoqarani, ilaatigullu akinik qaffassaattaarnerit ingerlallutik, tamakkulu tamaasa ataatsimoortumik nalilersortariaqalerpagut ilumut akit qaffakkiartuinnassanersut, taamatullu ingerlaannartoqassanngippat sukumiisumik oqallissutigineqartariaqarput, ilaatigullu aningaasartuutikillisaanissaq aamma ujartorneqartariaqalerluni.

Nunatsinni illut inoqanngitsorpassuit nunaqarfinni illoqarfinnilu asuli kiassarneqartut nakkutigineqarlutillu paarineqartut amerlasuujusut oqaatigissagaanni uniorpallaarunangilaq, tamannalu aamma atuisunut allanut akikitsuinnaagunangilaq, tassami ineqarnerminnut akilersuinerminnut ilannguttaraat inissianik attartortitsisartut oqaatigisarmassuk.

Inupparujussuit ilaqutarillu meerartallit inissaaleqisut amerlagaluaqisut, assorujussuaq paasiuminaattarpoq ilaatigut illut arlallit ukioq ataasiinnangitsoq kiassarneqartut isigalugit, inissaaleqisoqaraluaqisoq sooq illorpassuit inoqanngiinnarpat kiassarneqarlutillu? Aqutsineq ineqarnermut pitsanngippallaarpaa? Allaffissorneq pitsanngippallaarpaa? Imaluunniit sullissisut inissiatileqatigiiffiit avataanni amerlavallaarpaat? Imaluunniit nammineq init

piginnginnamikkit soqutiginnilaat inoqanngikkaluarpata? Inoqanngikkaluarpatami isertitassamikkit annaasaqaatiginaviannammikkit, attartortummi allat qanorluunnit aningaasarsiakitsigigaluarunik akilersorpaat, naak ineqarnerminnut akiliutitik saniatigut qaffasikkaluaqisut. Apeqqutissat killeqanngitsut pinngoralersarput, tassami illut inoqanngitsut kiassarneqarlutillu nakkutigineqarput, soorunami tamanna aningaasarpassuarnik naleqarpoq, tamakkulu attartortunut aningaasarsiakitsunut akilersortinneqarnerat tassa tamaanga killeqartariaqalerpoq.

Naalackersuisut ineqarneq pillugu 2015-mi upernaakkut isumasioqatigiissitsipput tamakkulu qanoq kinguneqarniarnersut paasillugillu tusarusunnarsipput.

Taamaattumik pissutsit pitsaanerulissappata taava suna tamaat sukumiisumik oqallissutigisariaqalerparput tassami innuttaasut akilersugaat qaffakkiartuinnartut soqutiginningsutut illugit ingerlatsineq akitsoriartuinnartoq akueriinnarsinnaajunnaarparput.

Inatsisartut oqaaseqaatissaannut siunnersuut

Nunatsinni ineqarnikkut akiliutit qaffakkiartuinnartut, taamatullu aamma ineqarnermut tapiissutip naleqqussarneqarnissaa, kiisalu kiassarnermut akiliutit apparsarneqarnissaat anguniarlugu Inatsisartut Naalackersuisut kammattorpaat Ineqarnermut isumasioqatigiissitsinneq 2015 upernaakkut ingerlanneqartoq tungavigalugu aaqquissuussinerit malitseqarteqqullugit piaartumik aallarteqqullugit.

Oqallilluarisi.

Hans Enoksen
Partii Naleraq